





15
HUMBLE
REMONSTRANCE
AU ROY

*Sur la verification des Edicts, & Declarations
de sa Maiesté.*

Touchant ceux de la Religion Pretendue
Reformée.

*Par Monsieur de Chezac Conseiller du
Roy en ses Conseils, d'Estat & privé, cy-
deuant premier President en la Cour
de Parlement de Bordeaux.*



36
10283
2. Cor
A PARIS,
Chez ISAAC MESNIER, rue des Mathurins.
M. C D. XX.
Avec Privilege du Roy,

1620mt

Case A

F

39

326

1620mt

THE NEWBERRY
LIBRARY



H V M B L E
R E M O N T R A N C E
A V R O Y.

Sur les Edicts & declarations, contre ceux
de la Religion Pretendue Reformée.

S I R E,
On faict vn estrange & mer-
ueilleux recit d'un Hercule
Gaulois, autrement surnom-
mé Ognien, lequel on d'espeignoit a-
uec l'habit & les armes de l'Hercule
Thebain, mais en outre sortoient de
sa bouche de longues & menuës ches-
nette d'or & d'electre, pendüe au bout
de sa langue, avec lesquels il tenoit a-
tachée par les oreilles vne multitude
infinie de gens, qui garrotez de chais-
sons si fressles & si menus, se laissoient
neantmoins raurir tres-volontiers, cō-

me ioyeux de leurs captiuité, voulant dire par là les François, que leur Hercule estoit vn personnage tres-eloquent, qui par la douce force de son bien dire gaignoit les hommes, les attiroit à sa cordelle, & les soubmettoit à son aucthorité.

SIRE, nostre sage & bien disant Hercule, on peut en ce faict icy parangonner à bon droict vostre Maiesté, à ce Prince des Druydes, veu que par vn eloquence sainte & non prophane vous auez aquis les affections des François vos tres-humble subiects, car le saint effort de vostre langue rauit le cœur de vos peuples par leurs oreilles.

Que pleut à Dieu SIRE, que cette Catholique éloquēce eust pareil pouoir pour attirer quant & quant vos autres suiects à l'Eglise, & que ces Peuples, qui se vêtent d'auoir suiuy vostre

Maieſté des leur ieuneſſe en des paſſages perilleux, ne l'euffent point quittée au chemin de ſalut: pleuſt à Dieu ne vous euſſet ils point enuié l'honneur acquis par Coſtatin en grece, par Clouis en France, par Eduin en Angleterre, par Kanuthez en Danemark, par Ricardus en Eſpagne, par Venelas en Pologne, & par cent autre Rois & Princes Chatolique d'auoir aporté à l'Egliſe avec la Royale offrande de leurs perſonnes des peuples & Royaumes entiers, ainſy que ſont les grandes, & Fameuſes Riuieres, qui ſenſlent & ſ'accompagnēt d'infinis ruſſeaux & fontaines quand il eſt queſtion de faire homage à la *Mer Oceane*.

Car certainement c'eſtoit bien l'eſpoir de la France & de toute la Chreſtiente, que voſtre tres-Auguſte Maieſte' ameneroit quant et ſoy, vne grande ſuite de ſes ſubiects, et comme il

est plus aysé que la nature fouruoye & se d'esbauche en son ordre, que les subjects ne laissent d'ensuiure & imiter leur Prince, chacû s'estoit promis que ce grand & premier mouuement de vostre Royal exemple, rauiroit avec soy ceux de la Religion pretenduë Reformée, dans le giron de l'Eglise, comme le mouuement du premier Ciel emporte celuy des corps inferieurs, mais leur indisposition a esté si grande, que la voix de vostre MAIESTE, qui à bien sçeu rapeller à recognoissance vn milion de vos subiects, n'a peu alors auoir assez d'efficace en leur endroict pour les reclamer & ramener à la recognoissance de la Religion Catholique.

Il ne faut toutefois pas desespérer, qu'au traicté du temps que vostre Majesté ne puisse operer leur salut, & qu'elle ne face esclorre en eux de beaux & merueilleux effects à l'exemple des

aspects & grandes conionctions des Planettes, qui ne se hastent pas tousiours de produire leurs operatiōs soudainement, ains quelquefois remettent, pour quelques anées à manifester l'efficace de leurs vertus & le pouuoir de leurs influences, & alors vostre MAIESTE' sera au sommet de la gloire, & la France au giron de son repos.

SI RE, il à semblé a Vostre Cour de Parlement de Bordeaux qu'il n'estoit mauuais de représenter tres humblement a Vostre MAIESTE' qu'il n'estoit pas expediant d'octroyer a ceux de la Religion Pretendue Reformée en temps de paix, plus qu'ils nont eu en temps de guerre, & plus que l'Edict de lan 1577. duquel vn grand Roy s'est bien contenté, Elle na sceu comprendre la necessité de l'Estat, necessaire' laquelle seule dispense de tolerer vne Religion autre que la Catholique

& luy faire des'aduantages: car comme vn globe ne peut toucher autre corps plenier & esgal qu'en vn seul point, ainsi ne peuuent les reigles de Religion conuenir amyablement avec les reigles d'Estat, qu'en vn seul point, ascauoir celuy de la nccessite', qui à poincte la conscience avec la police, l'Eglise avec l'Estat.

La crainte d'vne guerre future ne s'est point representée deuant vostre Cour de parlement, ny de la part de ceux qui ont poursuiuy l'Edict, lesquels n'ont plus vn grand Roy, qui estoit leur cheueu fatal, que la piete' leur à retranche', pour le reioindre au chef de l'Eglise, ny de la part d'autre quelconque, tous les François sont auiourd'huy vos bons fidels sujets tous tres obligés à V. M. las & incommodez desguerres passees, ils sont tous sages & trop aduisez pour songer à de nouueaux remuemens et cracher contre le Soleil.

Et puis

Et puis Vostre MAIESTE' peut auoir entē
 du ce que disoit vn Sainct Pere, que si on
 redoutoit les hommes Iusque là qu'il falut
 octroyer à leur desespoir, ce qui leur conui-
 ent denier par Iustice, ce seroit bien tost fait
 de la Religion & du gouuernement de l'E-
 glise, il ne le faudroit q̃ ce des'esperer & de-
 mander pour l'abbattre en ruine, mais ce n'est
 point à vn Cæsary à vn Alexandre, ce n'est
 point à V.M. qu'il faut faire peur de la guer-
 re, ce n'est point, SIRE, sous vostre bon &
 pieux Regne, que les François seront saisis
 de si vaines apprehensions, & terreurs pani-
 ques.

Et par ainsi si vostre Cour de Parlement
 n'a sceu apprehender ou comprendre vne ne-
 cessité, à vn trouble à uenir, SIRE, ne les
 en blasmez pas, mais accusez - en s'il vous
 plaist vostre Magnanimité vos prouesses,
 vos grands faiets d'armes, vos victoires in-
 signes, qui portent l'effroy & del'espouuēte-
 ment par tout : accusez - en vostre grand
 soin & capacité, vostre sage conduite, vo-
 stre longue experience, vostre bonne fortu-
 ne, vostre bienveillance publique, bref SIRE,
 accusez - en vous mesmes, & non vostre
 Cour de Parlement, car vos subiects ne peu-
 uent rien apprehender durant vostre vie

quel'accourcissement d'icelle.

Et neantmoins, nonobstant cette consideration de la paix, hormis quelques articles, vostre Cour de Parlement a arresté la verification du surplus de l'Edict, quoy que maintes articles importans fussent adioutez à celui del'an 1577.

Car Sire, elle a creu comme faict aussi (ce tres-Auguste Senat) la Cour de Parlement de Paris, que ces mots nouveaux, qui ont parcoulé le proëme de l'Edict de Nantes parmesgarde (car V. M. n'a point coustume d'vser de semblables termes) *affin que Dieu puisse estre adoré & prié par tous vos bons suieçts sinon en mesme forme & Religion, au moins d'une mesme intention.* elle a creu dis-ie que ces mots la ne se pouuoient passer sans qu'elle y adiousta tres-expressement cette clause, *sans approbation toutefois de la Religion Pretendue Reformée:* ces mots la ont bien leurs couleurs apparentes, qui autrefois sont entrées aux Remonstrances de deux grands personages Payens, à sçauoir en celle du Philosophe Temistius à l'Empereur Valens, Arcadius à Theodoze, mais l'Eglise Catholique faict vn iugement tout diuers, à sçauoir que tout ainsi qu'il ny a qu'une vraye Religion au monde, que Dieu aussi ne peut estre

adoré ny seruy qu'en cette seule Eglise & Religion, que V. M. & vos Parlemēts treuvent estre la Catholique, Apostolique, & Romaine.

Quant à la prouision indifferente de tous offices Sire, vostre Cour de Parlement n'ignore pas que ceux de la Religion Pretenduë n'en soiēt capables & qu'ils n'y puissent estre receus indifferemment, ores bien que cela soit fort prejudiciable à l'exaltatiō del'Eglise Catholique, & auantageux, pour la Pretenduë Reformée, que ce ne soit pas si amplement la tolerer, mais l'establir & promouuoir avec les personnes, si est-ce qu'en consideration, qu'ils sont François, & vos sujets, & membres del'Estat, & que la necessité des affaires les requiert ainsi, les feu Roys de bonne memoire vos predecesseurs, leur ont accordé telles promotions & la participation aux offices par leurs Edicts verifiés en la Cour, mais ça esté avec cette clause inferrée en l'Edict de soixante seize & dixsept, *comme verrons estre à faire pour le bien de nostre seruice & de nos sujets*, lequel nous vous remonstrons tres-humblement, SIRE, requerant qu'il soit pourueu de generaux, & de leurs substitus qui ont interests en toute cause del'Eglise, & qui pouroient

entreprendre sur les droicts d'icelle, s'ils n'estoient Catholiques & ruiner peu à peu la Religion, semblablement es charges de Presidens, Lieutenans/generaux: és Sieges des Senechaux, Presidens és Cours Souuerainnes, & Gouverneurs des Prouinces, car les Catholiques sont les pierres qu'il conuient mettre en œuvre, au frontispice, & aux coings du bastiment de cet Estat: ceux de la Religion Pretenduë Reformée, sedoiuent contenter d'en faire la liaison és lieux & places moins importantes, estans tresapropos de cacher ainsi cette nouueauté, & changement aux officiers qui ne peuvent nuire que par leur seule voix, car aux chefs des compagnies cette nouueauté se découure plus clairement, & porte plus de dommage que non pas aux membres, plus en ceux qui commandent, qui sont peu, qu'en ceux qui obeissent, lesquels sont en beaucoup plus grand nombre.

Il est donc très vtile & expediant, SIRE, de leuer toute deffiance de vos sujets Catholique, laquelle ils laisseroient aisement glisser en leurs cœurs, s'ils estoient gouuernez autrement & feroient peut estre iugement, que V. M. dou' teroit non seulement de leur suffisance, mais aussi de leur fidelité,

car il est bien ſceant que tels viuants portraits, poſez au iour de vos Cours Souueraines, retiennent naiſſement les principaux traits de la Religion Catholique, auſſi bien que ceux des autres vertus morales, & les ombrages & racourciſſement de puissance & authorité, qui leur eſt communiquée par V. M.

Le ſperance que nous auons que V. M. aura eſgard a cette tres humble Remonſtrance, & vſera enuers le Parlement de Bordeaux, de pareille faueur, qu'elle a vſé enuers celuy de Paris, & la crainte d'eſtre long & ennuyeux fera q̃ ie cōcluray par les prieres que ie fais à Dieu qu'il vous conſerue Roy tres Chreſtien, tres Catholique, nouveau Clouis, nouveau Conſtantin, plus heureux qu'Auguſte, meilleur que Trajan, Dieu qui vous a donné du Ciel vous conſerue, Dieu vous protege, & la France avec vous Pere de la Patrie, liberateur de la France, conſeruateur de la Religion Catholique: nous adorons vos Victoires & Lauriers, vos Palmes & Oliuiers de Paix, les vns vous ombragent le chef, les autres ſont pour la commodité de vos ſubiets, vivez lōgues années, vivez pour vous & pour voſtre peuple, voſtre vie c'eſt la vie de vos ſubiets, voſtre

contentement c'est le bon heur de vostre Estat.

Cesont les acclamations que non seulement les Romains faisoient aux Empereurs triomphans, ains encores les saincts & sacrez Conciles aux Princes Catholiques, lesquels nous assemblons sur vostre sacré chef, cōme autant de fleurons a vostre couronne, autāt d'années & de siecles à la vie de vostre Maie-
sté, autant de tesmoins à la posterité de nostre tres-humble & fidelle seruice.

F I N.

Monsieur de Chezac premier President au
Parlement de Bourdeaux, ayant prononcé ce
que dessus au Roy, sa Maiesté fit tel estat de son e-
loquence & bon iugement, qu'il à dit souuentefois
du depuis qu'il n'auoit iamais ouy mieux dire à so-
gré, Messieurs de Sessac & de l'Escure Conseillers
audict parlement, deputez avec luy, scauent quel
accueil il récent de sa Maiesté, & avec quelle pru-
dence il s'acquitta de sa commission, & à l'instant
le Roy luy dit, qu'il se fioit tant sur sa prudence &
fidelité, qu'il ny auoit personne plus capable de luy
faire seruice, & partant il le desputa pour cet effect,
& l'enuoyer à Nerac, pour donner commencement
à la chambre de l'Edict, ci qui fut executé au con-
tentement du Roy, & des deux partys.

Extrait du Priuilege du Roy.

PA r lettre patente, grace & Priuilege du Roy, il est permis à Anthoine Mesnier, Marchand Libraire à Poictiers, d'Imprimer ou faire imprimer les Remonstrances & Harangues de Monsieur de Nesmont Sieur de Chezac premier President au Parlement de Bourdeaux, & deffence leur faicte à tous Libraire, Imprimeurs, & autres personnes de ce Royaume, les contrefaire, de vendre, ny debiter, pendant le temps de six ans sans le consentement & permission dudit Mesnier, sur painne de cinq cens liures d'amende, confiscation des exemplaires, & de tous despans dommage & interest, comme plus amplement est contenu esdictes lettre & Priuilege.

Signé par le Roy en son Conseil.

R E N O V A R T.

Anthoine Mesnier Marchand Libraire, suivant le Priuilege obtenu de sa Ma. esté, pour l'impression des Remonstrances & Harangues faicte par Monsieur de Nesmont Sieur de Chezac, faicte tant au Roy, que autre diuers lieux, a permis à Isaac Mesnier son frere, aussi marchand libraire, de faire imprimer la Remonstrance faicte au Roy, sur la verification de quelques Edicts & Declarations, touchant ceux de la Religio Pretendue Reformée, prononcé à sa Ma. esté par ledict Sieur de Chezac, à Poictiers ce 16. Nouembre, 1620.

